

**Тропарь и кондак преподобному Алексею Зосимовскому**  
22 октября 2015 г. 22:15

Тексты тропаря и кондака преподобному Алексею Зосимовскому  
утверждены на заседании Священного Синода 22 октября 2015 года  
([журнал № 81](#)).

**Месяца сентября в 19-й день**  
**Преподобнаго Алексея, Зосимовскаго**

**Тропарь, глас 5:**

**Я**ко звезда путеводная/ и утешитель богомудрый/ в годину лютых  
испытаний явился еси,/ затворниче предивный отче Алексие,/ огнем бо веры  
распалаемь,/ любовь Христову стяжал еси,/ темже и, благодать Духа Святаго  
восприем,/ имя избранника Божия на патриарший престол/ жребием открыл  
еси./ Ныне же, Святей Троице предстоя,/ моли спаситися душам нашим.

**Кондак, глас 1:**

**Б**лагочестиваго корене отрасль святая,/ многими добродетельми от  
юности просиял еси,/ любовь Христовою уязвився,/ евангельски людем  
послужил еси,/ и, в пустыню Зосимову вселився,/ неоскудный источник  
благодати показался еси,/ преподобне старче наш Алексие,/ Церкви Русския  
украшение./ Слава Давшему ти крепость,/ слава Избравшему тя,/ слава  
Действующему тобою всем исцеления.

**Молитва**

**О**, преподобне отче Алексие, предивный угодниче Христов, чудотворче  
и преславный подвижниче! Ты, многия добродетели стяжавый и любовь  
Божественною озаренный, людем верным утешитель и духовный наставник  
явился еси. Во времена же скорбных испытаний веру Православную  
утверждая, колеблющихся укреплял еси, немощныя со одра восставлял еси и  
всем чудный помощник и молитвенник был еси. Ныне смиренно молим тя,

отче святой, разслабленныя поддержи, страждущия и больныя уврачуй и всем, притекающим к тебе, милостив предстатель пред Богом буди.

О, преподобне отче Алексие! Помози нам стяжати смирение и кротость, да упразднятся раздоры и нестроения и да пребудем в братолюбии и покаянии, прославляюще Троицу Святую Отца и Сына и Святаго Духа.

Аминь.